

Evening Dogri News

04 November 2024

18:15 Hrs

Headlines

- उपराज्यपाल मनोज सिन्हा होरें अज्ज जम्मू-कश्मीर विधानसभा गी संबोधित कीता। जम्मू-कश्मीर च मुकामी विकास ते भलाई बेहतरी आहिलें केई पैहलकदमिं दी घोषणा कीती।
- एल.जी होरें घोषणा कीती ऐ जे उंदी सरकार लोकें गी 200 युनिट मुफ्त बिजली उपलब्ध कराने दी पक्की बवस्था करोग।
- मनोज सिन्हा होरें आखेआ जे उंदी सरकारै निवेश आकर्षित करने ते कम्म-रोजगार दे मौके पैदा करने गितै जम्मू-कश्मीर दी शिक्षा दा इक प्रमुख केंद्र बनाने दा मन बनाए दा ऐ।
- मुखमंत्री उमर अब्दुल्ला होरें विधानसभा दे स्पीकर अब्दुल रहीम राथर होरें गी आखेआ ऐ जे ओहू सब्बनं सियासी पार्टिं कन्नै इक्के नेया बवहार करन।

<><><><><><>

LG Address

लेफ्टिनेंट गवर्नर मनोज सिन्हा होरें अज्ज जम्मू-कश्मीर केन्द्र शासित प्रदेश दी असैम्बली गी संबोधित कीता ते इस मौके उनें प्रदेश च मुकामी विकास ते कल्याण गी बढ़ावा देने आहिलें केई पैहलकदमिं दी घोषणा कीती। उनें आखेआ जे कश्मीर गी रेल राहें मुल्खै दे बाकी हिस्सें कन्नै जोड़ने दा कम्म तौले गै पूरा होने आहला ऐ। उनें आखेआ जे सरकार योग्य परोआरें गी 200 युनिट बिजली मुफ्त करोआग। एहदे अलावा उनें प्रदेश च 46 नमें औद्योगिक एस्टेट विकसित करने दिएं योजनाएं दा बी जिक्र कीता जेह्दे नै प्रदेश दे औद्योगिक खेत्तर दा विस्तार जकीनी बनोग। उनें आखेआ जे सरकार मुकामी कारीगरें गी सशक्त बनाग ते हत्थखड़ी सैक्टर गी पक्क गै उबड़ा चुक्केआ जाह्ग। एलजी होरें जम्मू-कश्मीर दा राज्य दा दर्जा ब्हाल करने दी

दिशा च कम्म करने दा बी वायदा कीता। एहदे शा पैहले सदन च उसलै हंगामे आहली स्थिति बनी गई जिसलै पीडीपी दे विधायक आसेआ दफा 370 हटाए जाने दे खिलाफ प्रस्ताव सदन च पेश कीता गेआ। एहदे पर बीजेपी दे सदस्ये त्रिकुषी प्रतिक्रिया दिती।

<><><><><><>

LG-Education

लेफ्टिनेंट गवर्नर मनोज सिन्हा होरें आखेआ जे उंदी सरकार दा मकसद जम्मू-कश्मीर गी शिक्षा दे केंद्र च तब्दील करने लेई पूंजीनिवेशकें गी आकर्षित करना ते रोजगार दे मौके पैदा करना ऐ। आई.आई.टी ते आई.आई.एम जम्मू दी स्थापना जम्मू-कश्मीर च उच्च शिक्षा दी बेहतरी लेई चुके गेदे महत्वै आहले मील पत्थर न। एह उत्कृष्ट संस्थान प्रांतै दी योग्यता च निखार लेयोने, नमिएं काडुं गी बढ़ावा देने लेई भलेआं तैयार न। आई.आई.एम जम्मू दा श्रीनगर कैंपस प्रांतै च म्यारी प्रबंधन शिक्षा दी पहुंच बधाग। कालजें ते विश्वविद्यालयें दे ढांचागत विकास गी तगड़ा कीता जाग ते उत्थें मनासब अमला बी तैनात कीता जाग। राष्ट्रीय शिक्षा नीति 2020 दे इक हिस्से दे तौर शिक्षकें, विद्यार्थिं लेई शोध दियां सहूलतां हासल करोआने पर ध्यान केंद्रित कीता जाग।

<><><><><><>

LG-Tourism

लेफ्टिनेंट गवर्नर मनोज सिन्हा होरें आखेआ ऐ जे सैलसफा सेक्टर जम्मू-कश्मीर दी अर्थ बवस्था दा इक मुख थम्म ऐ जेड़ा होरनें सेवाएं जियां ट्रांसपोर्ट खातिर तवज्जो बागवानी ते लघु उद्योगें गी बढ़ावा देइयै स्थानीय लोकाई लेई रोजगार दे मौके हासिल करोआइयै आमदन पैदा करने च मदाद करी सकदा ऐ। उने आखेआ जे मेरी सरकार एह पक्का करोग जे सैलसफा सेक्टर गी उद्योग आंगर सब्बै लाभ दित्ते जांगन। एहदे कन्नै एह यकीनी कीता जाई सकोग जे इस सेक्टर च पूंजी निवेश च बाढ़ा होग ते फिर सैलसफे ते सरबंधत सेवाएं च सुधार दिक्खने गी लब्बोग। एल.जी होरें आखेआ जे म्यार बधने कन्नै सैलानिं दे तजुर्बे बी बेहतर होडन ते सैलानिं दी आमद बधाने आस्तै बी होर हीले कीते जाई सकडन।

<><><><><><>

LG-Health Care

लेफ्टिनेंट गवर्नर मनोज सिन्हा होरें आखेआ जे मेरी सरकार जम्मू-कश्मीर दे नागरिकें गी भलेआं अज्जै-कल्लै आहिलयां सेहत सहूलतां मुहैया करोआने लेई बचने बढी दी ऐ। ग्रामीण इलाकें च सेहत सहूलतें, वशेश करी जच्चा-बच्चा दी सेहत च मता-मता सुधार कीता जाग। जिलें च क्रिटिकल कार ब्लॉक खडेरे जांगन ते आपात सेवाएं गी तगड़ा कीता जाग। सरकार म्हेशां मेडिकल शिक्षा ते सेहत सेवाएं दे बाहे विकास गी प्राथमिकता दिंदी आई ऐ। उनें आखेआ मेरी सरकार एमबीबीएस पीजी ते नर्सिंग सीटें गी बधाने वल ध्यान केंद्रित करोग। एह्दे अलावा उत्कृष्ट डाक्टरें गी नमें बने दे संस्थानें च कम्म करने लेई बी सरकार प्रेरित करोग ते कन्नोकन्नी प्रांतै दे उत्कृष्ट डाक्अरें दे बाहर जाइयै कम्म करने आहली चुनौती कन्नै बी निब्बड़ग।

<><><><><><>

LG-Drug

लेफ्टिनेंट गवर्नर मनोज सिन्हा होरें आखेआ ऐ जे जम्मू-कश्मीर च नशीली दवाइएं दी कवैथ इक जटिल चुनौती ऐ जेह्डी समाजी-आर्थिक पहलुएं ते ऐतिहासिक संदर्भ कन्नै जुडी दी ऐ। पिछले दहाके च जम्मू-कश्मीर च नशाखोरी दी कवैथ बधी ऐ जिनें नौजोआनें गी बुरी चाल्ली प्रभावित कीता ऐ। कनून आयद करने ते नाआबादकारी करने आहिलएं पैहलकदमिं इस कवैथ कन्नै निब्बड़ने लेई केई कोशशां कीतिआं फही बी एहू समस्या इक चुनौती बनी दी ऐ। हून लक्ष्य छड़ा नशीली दोआइएं पर निर्भरता गी घट्ट करना नेई सगुआं जम्मू-कश्मीर च नेह सशक्त सरिस्ते गी तैयार करना ऐ जेड़ा नशाखोरी दे कारणें दी जड़ा तक पुज्जियै प्रभावितें दी बाआबादकारी ते उनेंगी मुख धारा च शामिल करने लेई इक साजगार माहौल देना ऐ।

<><><><><><>

LG Road Network

लेफ्टिनेंट गवर्नर मनोज सिन्हा होरें आखेआ ऐ जे संपर्क सरिस्ते, अर्थबवस्था लेई बड़े महत्वपूर्ण न। उनें आखेआ जे सिड़क नेटर्व च बड़ा मता सुधार कीता गेदा ऐ ते बकाया रौह्दे इलाकें गी सिड़क राबते उपलब्ध करोआने लेई अजें बी होर जतन कीते जाने लोड़चदे न। उनें आखेआ जे जम्मू-कश्मीर सरकार, केन्द्र सरकार दिंय योजनाएं जिआं प्रधानमंत्री ग्राम सिड़क योजना ते

नाबार्ड दे राहें हर इक ग्रां गी सिड़क कन्नै जोड़ोग ते बड़े सिड़क संपर्क प्रोजेक्टें दे कम्में च होर तेजी आह्नी जाह्ग। एह्दे अलावा एक्सप्रेस-वे, जरनैली सिड़कें ते रिंग रोड परियोजनाएं दी रफ्तार बी बधाई जाह्ग। उनें आखेआ जे इनें पैहलकदमिं दा मकसद दूर-दरेडे ते पच्छेत्ते इलाकें गी सिड़क संपर्क राहें जोड़ना ऐ तांजे आर्थिक विकास दी रफ्तार तेजी कीती जाई सकै।

<><><><><><>

CM Speaker

मुख्यमंत्री ओमर अब्दुल्ला होरें विधानसभा दे स्पीकर अब्दुल रहीम राथर होरें'गी गुजारिश कीती जे ओहू सदन दे सब्बनें सदस्यें कन्नै इक्कै नेया बवहार करन। उनें आखेआ जे स्पीकर होर सदन दे अध्यक्ष न ते उनें'गी लोड़चदा ऐ जे ओहू सत्ता पक्ष ते विपक्ष दौनें दे सदस्यें गी अपनी गल्ल रक्खने दा इक बरोबर मौका देडन। बीजेपी विधायक ते विपक्ष दे नेता सुनील शर्मा होरें बी स्पीकर होरें'गी पूरा सैह्योग देने दा जकीन दोआया। उंदे अलावा कांग्रेस पार्टी दे जी.ए. मीर होरें बी स्पीकर हुंदा सोआगत कीता। सीपीआई(एम) दे विधायक मोहम्मद युसुफ तारीगामी होरें आखेआ जे स्पीकर होर सदन दे सब्बनें सदस्यें दी नुमाइंदगी करदे न। एह्दे शा पैहले एनसी दे वरिष्ठ नेता अब्दुल रहीम राथर होरें'गी सब्बनें दी सैह्यति कन्नै विधानसभा दा स्पीकर चुनेआ गेआ। राथर होर केन्द्र शासित प्रदेश दी विधानसभा दे पैहले स्पीकर बने न।

<><><><><><>

Speaker Address

स्पीकर अब्दुल रहीम राथर होरें अज्ज एलजी मनोज सिन्हा हुंदा अभिभाषण विधानसभा दे अगगे पेश कीता। राथर होरें उनें'गी स्पीकर चुनने लेई सब्बनें सदस्यें दा धन्नवाद कीता ते आखेआ जे इस सदन च सब्बनें गी अपने सरबंध्यत इलाकें दे विकास आहले मामले पुट्टने लोड़चदे न। उनें सब्बनें गी गुजारिश कीती जे ओहू सदन दा समें बर्बाद नेई करन। उनें आखेआ जे अपने पूरे सियासी करियर दे दरान उनें सदा गै सदन दे नियमें दी पालमा कीती ऐ। राथर होरें पैहली बारी सदन दी कार्रवाई दा हिस्सा बनै करदे 51 नमें विधायकें गी मुबारकबाद दिती।

LG-Migrants

उपराज्यपाल मनोज सिन्हा होरें आखेआ जे उंदी सरकार कश्मीरी विस्थापितें गी पूरे मान-सम्मान कन्नै परतिए कश्मीर घाटी च बसाने ते उंदे लेई पूरी चाल्ली सुरक्षित ते रमानदार माहौल तैयार करने लेई बचनबद्ध ऐ। उनें आखेआ जे कश्मीरी विस्थापित मलाजमें दे ठैहरने लेई रिहायशी क्वाटर बनाने दे कम्मै च तेजी आंदी जाग तां जे ओहू तौलें उत्थें रौहना शुरू करी सकन।

<><><><><><>

LG-PM-AY

उपराज्यपाल होरें आखेआ जे उंदी सरकार प्रधानमंत्री ग्रामीण आवास योजना तैहत मंजूर मकानें दा कम्म तौले मुकम्मल करना यकीनी बनाग ते बाकी रौहंदे सब्बनें योग्य लाभार्थिं गी बी एहदा लाहू पुजांदे होई उंदे सिरै पर छत दी बवस्था कीती जाग।

<><><><><><>

Railways Special Trains

छठ पूजा दे मद्देनज़र भारती रेलवे आसेआ अज्ज मुल्खै दे बक्ख-बक्ख हिस्सें लेई 185 विशेष रेलगड्डियां चलाईयां जा करदिआं न। अज्ज दिल्ली एनसीआर थमां मुल्खै दे बक्ख-बक्ख हिस्सें लेई 25 विशेष ध्यारी रेलगड्डियां बी चलाईयां जा करदिआं न। इंदे च सहरसा, वाराणसी, अयोध्या, लखनऊं, पटना, मुजफ्फरपुर, गोरखपुर, प्रयागराज, दरभंगा, इन्दौर ते थिरूवनन्तपुरम स्टेशन शामिल न। आकाशवाणी खबरें कन्नै गल्ल करदे होई उत्तर रेलवे दे जन सम्पर्क अधिकारी हिमांशु शेखर उपाध्याय होरें आखेआ जे नियमित रेलगड्डिं दे अलावा रेलवे आसेआ विशेष ध्यारी रेलगड्डियां बी चलाईयां जा करदिआं न तांजे लोक बिजली कुसै दिक्कत परेशानी दे छठ पूजा लेई अपनी तय थाहें तक र पुज्जी सकन। रेलवे बोर्ड दे अध्यक्ष सतीश कुमार होरें जंदी रातीं नमीं दिल्ली रेलवे स्टेशन दा दौरा लाइयै उत्थे जातरिएं लेई उपलब्ध

सुविधाएं दी समीक्षा कीती। रेलवे आसेआ पिच्छले म्हीने दी पैहली तरीक थमां लेइयै इस म्हीने दी 30 तरीक तगर 7 ज्हार विशेष रेलगड्डियां चलाईयां जा'रदिआं न।

<><><><><><>

Jaishankar Australia

विदेश मंत्री डाक्टर एस. जयशंकर होरें अज्ज ब्रिसबेन च भारत दे नमें महावाणिज्य दूतावास दा उद्घाटन कीता। डॉ जयशंकर होरें इस मौके पर आखेआ जे एहू राजदूती दफ्तर क्वींसलैंड दे कन्नै भारत दे सरबंधें गी तगड़ा बनाने, बपार बधाने, शैक्षणिक संपर्क दा विस्तार करने ते भारती मूल दे लोकें गी सुविधा पुजाने च जोगदान देग। उनें इसी भारत ते ऑस्ट्रेलिया दे लगातार मजबूत हुंदे दपक्खी सरबंधें च मील दा पत्थर करार दित्ता। विदेश मंत्री होरें आखेआ जे इस सफारतखाने कन्नै प्रधानमंत्री नरेन्द्र मोदी हुंदा ऑस्ट्रेलिया च रौहने आहले भारती समुदास दे लेकें कन्नै पिच्छले ब'रे कीता गेदा वायदा पूरा होई गेआ ऐ। जयशंकर होरें क्वींसलैंड दिएं गवर्नर डॉ. जीनेट यंग हुंदेरै बी मलाटी कीती। बैठक दे दरान दौनें नेताएं भारत ते क्वींसलैंड बश्कार आर्थिक, बपार ते निवेश सैह्योग गी तगड़ा बनाने दक नमें मौकें ते तरीकें पर चर्चा कीती।

<><><><><><>

Joshi ISA

नमीं ते अक्षय ऊर्जा दे केन्द्री मंत्री प्रल्हाद जोशी होरें अज्ज आखेआ जे भारत नै ब'रे 2030 तगर 500 गीगावाट नवीकरणी ऊर्जा समर्थ हासल करने दे अपने लक्ष्य चा 90 गीगावाट सौर समर्थ स्थापित करी लैती ऐ। जोशी होर नमीं दिल्ली च अंतर्राष्ट्री सौर गठबंधन दे 7में इजलास दे उद्घाटन समारोह गी संबोधित करै करदे हे। उनें आखेआ जे सरकार नै 37 इशारिया 5 गीगावाट दी नवीकरणी समर्थ आहले 50 सौर पार्कें गी मंजूरी दित्ती ऐ। उनें आखेआ जे इस ब'रे आलमी सतह दे सौर उर्जा खेत्तर दे तकरीबन 2 टेरावाट स्थापित सौर फोटोवोल्टिक समर्थ तगर पुज्जी जाने दी पूरी संभावना ऐ। इस वर्ष अंतर्राष्ट्री सौर गठबंधन दा सम्मेलन भारत दी अध्यक्षता ते फ्रांस दी सह-अध्यक्षता च आयोजित कीता जा'रदा ऐ। सम्मेलन च सदस्य देशें दे सीमित ऊर्जा

आहले खेत्तरेँ च सौर ऊर्जा दी स्थापना च तेजी आह्मने दे तरीकेँ दे बारै च मुख रूप कन्नै चर्चा कीती जाह्ग।

<><><><><><>